

## 學游吟草

### 羈學經年歸家有感

歸來巷陌迓餘暉，人亦滄涼夢亦非。客夢每隨江水逝，詩懷惟伴暮雲飛。端居閒散豪情老，晚境貧寒壯志微。寓日春殘添寂寞，當年京闕景依稀。

### 二萬坪觀塔山夕照

夕色將沉倦鳥飛，雲峰絕頂掛斜暉。人閑氣魄情將小，夢老江山願亦微。昨日孰知明日是，今年更覺去年非。煙迷不悟前行盡，草露稀疏濕客衣。  
按：阿里山山脈之塔山，高聳巍峨，面西開闊。由二萬坪車站觀之，雲煙縹緲，霞色生輝，是謂一絕。

### 遊淡水誤入沙洲

商街進退少餘圓，小別人聲路幾彎。暮渚回頭微白鷺，煙雲極目渺青山。滿潮舟楫喧囂外，一紙詩魂寂寞間。唯看江翁拋盡餌，輕竿獨釣夕陽還。

### 其二

行至臨波不可行，憑欄佇望鳥銜晴。歸時暮色添風色，別處濤聲雜櫓聲。帆影飄搖前後路，桂香浮動古今情。晚堤寥落詩魂冷，燈火樓頭月漸明。

### 書懷

短笛吹殘遠犬號，蒼茫獨立賦牢騷。蹉跎年歲功催我，躑躅芳洲水濕袍。新月凌雲能望遠，群峰負氣以爭高。何時得意寒門出，一劍昂然嘯九皋。

### 夜讀夢寐思鄉後作

酣夢驚回一夜涼，唾痕書枕眼微茫。寒蛩窗下吟低語，幽草庭前遞淡香。月色逐風風逐月，鄉關望我我望鄉。經年莫敢頻回首，怕惹羈愁問短長。

### 看新聞有感後作

看盡螢屏罵與誇，廊階敗草亂如麻。人情造作腰眉眼，世道浮沈雀鴉鴉。信義猶存甘伏櫪，饑貧未濟恨浮槎。僵殘局內孤枰子，一片冰心倦冷茶。  
按：雀，麻將，賭也；鴉，老鴉，黃也；鴉，鴉片，毒也。

### 登樓有感

聊陟危樓頂，憑欄意不伸。平收天際色，俯看世間人。白眼輕狐黨，赤雲凌陌塵。一風辭樹葉，逐勢共漂淪。

### 野村新霽

新洗殘荷蓋，蒼山淡雨餘。天高雲氣遠，露重樹華疏。宿鳥應相識，羈懷只自書。提鞋依野水，萍底戲游魚。

### 偶回母校遇雨後作

四載堪爲客，重來倍惘然。煙迷春草徑，雨鎖暮雲天。風色如平日，襟情異少年。離愁休醉我，醉我落花前。

### 冬登雞籠山有懷

連階風凜冽，前去少人還。絕頂車如蟻，平嵐我亦山。石根狂草勁，雲棧末途艱。身世如孤注，乾坤一擲間。

曉望

松濤颯爽遞嵐煙，一脈雲開薄曉天。金旭凌霄沖灑氣，飛霞碎落萬山邊。

晚眺

向晚春江斂淡煙，黛峰凝碧水雲天。閒情不便人言語，我自沉吟過岸邊。

眼兒媚 女宿即景

芳縷輕妝倍娉婷，顰笑惹深情。一天星遠，宵深風靜，月上華燈。依依默默俛還送，欲語復吞聲。凝眸執手，且溫今夕，莫誓來生。

沁園春 遣懷

登罷雲煙，望斷江山，萬里夕陽。笑廿年蹤跡，堪如泥爪，儒袍蕭索，詩骨淒涼。雜處鴟鴞，龍蛇不辨，雞止高桐亦鳳凰。終知矣，縱懷瑜握玉，也作佯狂。人間寓目蒼茫，失群雁徘徊天一方。嘆江波樓閣，已非前見，陌頭楊柳，尙歇餘香。若夢浮生，星移物換，何處飄零何處鄉。無聊甚，已不堪醒醉，更懶悲傷。